

欽定大清會典事例

欽定大清會典事例卷一百四十七

八旗都統

公式 禁令二

乾隆元年議准。各省駐防官兵亡故。如家貧不能扶柩回京。准照軍前之例火化。官為送回。再各省駐防官兵已故婦女聞散人等骨殖。亦於每年官送之便。一併送京。○又奏准。旗人如有習天主教者。拏獲從重治罪。其參領佐領驍騎校族長等。失察隱匿者。該都統題參。交部嚴加議處。○三年奏准。凡旗人果有親族婚喪等事。

邀請分金以完正事者。毋庸禁止外。如有指稱名色。設席演劇。邀請分金。及不守本分之徒。將良家子弟誘引演劇。造言聚眾者。嚴拏從重治罪。○五年奏准。

盛京等處旗人身故。祖塋遙遠。不能送回。呈請火化歸葬者。由該佐領申報都統。移咨步軍統領衙門。委官往驗火化。再京外旗人奉差告假出外。身故無力扶柩回京者。呈報該處官員火化攜回。其餘概不准火化。違者治罪。佐領族長隱匿不報者。交部議處。○七年奏准。賭博。酗酒出

入圍館借放轉子印子典當兵米等事。每旗或
委參領或驍騎校前鋒護軍火器營亦委參領
護軍校等訪拏。係賭博之案。交刑部辦理。其餘
違例生事之案。交該管大員懲戒示衆。失察官
交部察議。仍令都察院滿洲堂官查旗御史五
城滿洲給事中御史步軍統領翼尉等嚴行訪
拏。○又奏准。凡有較射鵠者。准照常習射外。若
開設賭場抽頭。容留買局賣局之人賭錢者。拏
交刑部治罪。○八年議准。八旗鑄給圖記。原為
公事而設。至私借債負等事。不得用圖記作保。

如有濫用者。該都統指名題叅。三十年議准。八旗佐領及族長人等。能將該旗欠債之人。盡心稽察。至查出一二件重利借貸之事者。年終彙題。三年無過。給與紀錄。如將欠債之事。知情隱忍。或被該大臣查出。或被他人出首。俱交部嚴加議處。又奏准。八旗當差人等。漸改舊習。不守本分。嬉遊於前門外戲園酒館。仍照舊例。交八旗大臣步軍統領衙門。不時稽查。遇有違禁之人。一經拏獲。官員叅處。兵丁責革。並令都察院五城順天府衙門。出示曉諭。實貼各戲園。

酒館禁止旗人出入。○四十六年定八旗兵丁不准移住城外。除從前業經移居安靜守分者。仍令居住城外。各旗都統等時加訪查。有無潛移居住城外之人。於每年年終咨報直年旗彙奏。○五十年

諭。朕恭閱開國方略。仰見當日

太宗文皇帝特降諭旨。惟恐滿洲廢弛馬步射舊業。當方興之際。即訓誡毋廢舊業。可見滿洲理宜以此為要圖。朕臨御以來。辦理一切事件。皆法

祖宗。恐滿洲習氣日下。不時降旨。使各務根本。而詢問

清語多不能答。皆因伊父兄本業生疏。又不能教子弟。滿洲舊業。竟致廢弛。止設法令子弟勤圖文職。不思即得文職。亦當自思身為滿洲。勤習馬步射清語。各大臣官員等。雖不得仰見。

實錄。豈未嘗仰見各旗箭亭教場所刻。

太宗文皇帝聖諭碑文乎。若如此因循。惟圖安逸。必至歸入漢習。所繫甚大。嗣後須遵朕訓諭。將子弟嚴加教訓。留心習學。不失滿洲之舊業。經朕此次訓示後。儻仍漫不為事。痛改流弊。致有藝業平常。遇帶領引見之時。經朕察出。必將伊父兄一併治罪。將此旨通。

行曉諭八旗各省所有旗員大臣官員等一體奉行。
○五十三年奉

旨。各該旗有藉演弓箭為名。私賃廟內閒房聚會者。著
交八旗都統副都統不時嚴查。並交步軍統領衙門
一體嚴行查拏。○五十六年

諭。本日刑部奏驍騎校穆克登額責打民人李大身死。
請將穆克登額依罪人已就拘執而擅殺律擬絞監
候一摺。細閱此案情節。李大因馬甲威靈阿賒欠錢
文。於點鐘時赴營房索討。威靈阿之妻回覆伊夫外
出該班。李大不依。吵嚷。穆克登額差馬甲德通等將

李大擎至官廳責打重傷殞命刑部將穆克登額擬以絞監候於罪名尚無錯誤但摺內稱李大係屬有罪之人依擅殺罪人律定擬則所引殊未允協馬甲威靈阿賒欠李大錢文許以十月初八日下晚清還李大屆時往取其理本直並非有罪之人穆克登額庇護馬甲因李大出言頂撞喝令疊加杖責斃命自應按律擬抵而刑部輒稱李大究屬有罪是旗人欠負民人錢文俱不應索討勢必至益加橫恣遇有錢債事件民人竟不敢向其清理何以示平允而昭公當朕辦理庶務於旗民從不稍存歧視如民人應得

之罪。固當按律懲治。若曲在旗人。亦必加以重懲。不
少寬貸。惟期情真罪當。用法持平。絕無畸輕重於
其間。乃刑部以索欠之李大。指為罪人。是該管官員
袒庇於前。而刑部又袒庇於後。皆屬非是。刑部堂官
著飭行。並將此旨傳諭八旗。並各營房一體刊刻。張
挂。俾各觸目警心。共知懲戒。○嘉慶四年奏准。旗人
酒後行兇。如平日原係安分。偶爾酒醉。且並無
兇惡情狀者。該管官照例責懲。如係屢次酗酒
滋事。怙惡不悛。該佐領呈報將軍都統。查明滋
事實蹟。送部審明發遣。若任意擅送。情節不實。

將該管官議處。○七年

諭。本日戶部奏將兵丁扣餉之例請自今年八月起永
行停止等因一摺。已依議行矣。八旗兵丁日用所需。
惟賴餉銀資給。朕念伊等將應行扣餉之項加恩停
止。原為伊等生計起見。但伊等所以不足者。固由生
齒日繁。物價昂貴。亦由平日不知樽節。若能將衣食
二者隨時加意省嗇。即可免於匱乏。乃往往耽於口
腹。餉銀一經入手。不為度日之計。輒先市酒肉。一供
醉飽。不旋踵而資用業已告竭。又支領官米。隨即賤
價售賣鋪家。止顧眼前得錢使用。不肯稍為儲蓄。而

家中食米。轉零星用。貴價向鋪戶糴買。此皆失算之甚者。我滿洲瀋樸舊風。衣服率多布素。近則徇於習俗。兵丁等競尚鮮華。多用紬緞。以穿著不及他人為恥。試思旗人原以學習清語騎射為本。伊等技藝生疏。何以不知愧恥。惟於衣飾欲圖體面耶。國家恩養八旗。體恤周至。即如內城不許開設戲館。亦恐旗人花費銀錢。是以特加禁止。又旗地一項。因伊等屢行典賣。官為贖回。將所得租銀。於年終普行頒賞。所以加惠伊等。不一而足。又將扣餉之例。永行停止。無非欲伊等家計有資。漸臻饒裕。伊等亦應仰體朕惠愛。

懃奉之意。不可習於浮靡。坐耗物力。著八旗都統等轉飭參領以下官員。諄諭該管兵丁。敦崇節儉。力返敦龐。馴至家給人足。朕實有厚望焉。將此通諭知之。

○又

諭朕恭閱

皇考高宗純皇帝實錄。內載乾隆十八年七月欽奉

諭旨。滿洲習俗。瀋樸。自我朝一統以來。始學漢文。曾將五經及四子通鑑等書。繙譯刊行。近有不肖之徒。不繙譯正傳。反將水滸西廂記等小說。繙譯使人閱看。誘以為惡。甚至以滿洲單字還音鈔寫。替詞者俱有。

滿洲習俗之偷。皆由於此。不可不嚴行禁止等因。欽此。仰見我

皇考崇正黜邪。為風俗人心計者。至深且遠。從前滿洲盡皆通曉清文。是以尚能將小說警詞繙譯成編。

皇考深恐為習俗之害。嚴飭禁止。今滿洲非惟不能繙譯。甚至清話生疏。不識清字。其粗曉漢文者。又以經史至文。詞義深奧。難於誦習。專取各種無稽小說。日事披覽。而人心漸即於偷。此不獨滿洲為然。漢人亦更多蹈此陋習。如經史為學問根柢。自應細心研討。至諸子百家。不過供文人涉獵。已屬藝餘。乃鄉曲小

民不但經史不能領悟。即子集亦束置不觀。惟喜替詞俗劇及一切鄙俚之詞。更有編造新文。廣為傳播。大率不外乎草竊姦宄之事。而愚民好勇鬪狠者。溺於邪慝。轉相慕效。糾夥結盟。肆行淫暴。概由看此等書詞所致。於世道人心。大有關係。不可不重申嚴禁。但此時若紛紛查辦。未免假手吏胥。轉滋擾累。著在京之步軍統領。順天府五城各衙門。及外省之各督撫。通飭地方官。出示勸諭。將各坊肆及家藏。不經小說。現已刊播者。令其自行燒毀。不得仍留原板。此後並不准再行編造刊刻。以端風化而息詖詞。○又奉

旨。近來宗室覺羅人員。多有不繫黃紅帶。侍衛職官。不戴朝頂。在街市閒遊者。其意自以穿用常人服色。可以往來自便。必非習學正務。有志嚮上之人。此風斷不可不亟行飭禁。嗣後著步軍統領衙門。留心稽察。如有仍前違制者。即行叅處。○十年

諭。前因京師西洋堂人有與旗民往來習教。並私刊清字書籍傳播之事。疊經降旨嚴行飭禁。並令將各堂所禁書籍。檢出繳銷。當交軍機大臣將檢出書籍查看。旋據籤出各條呈覽。朕覽餘披閱。如教要序論內稱其天主是萬邦之大君。聖年廣益內稱所信降生

之耶穌。係普天下各人物之大君。又稱中國呼異端為左道。未必非默默中為承行主旨而有是言。又稱凡在天地天主之下。自君王以至士庶。人人棄邪歸正。聖教大行。未有不久安長治者。又稱我教之主。真正是天地人物之主。又稱憑他有道之邦。多係世俗肉身之道。又稱聖人欲乘此機會。傳教中華。又婚配訓言。內在外教者。如同魔鬼奴才等語。支離狂妄。怪誕不經。不一而足。而其中尤為悖謬者。則稱聽父母所命。相反於天主之命。為大不孝。有聖女巴爾拔拉。不肯聽從逆命。被頑父親手殺之。天主義怒。至以暴

雷擊死之。為人父母親友阻人事主者。當以此為鑒
等語。蔑倫絕理。直同狂吠。又稱當時有一箇貝子。終
日行非理之事。福音極力勸之不從。一日有一羣魔
鬼。拉貝子下地獄。天主以福音有德行。默啟他使知
伊夫火海永遠苦難。可見不聽善勸。決不免天主永
罰等語。尤為肆意亂道。貝子福音之稱。西洋人何從
知悉。自係從前與旗人往來談論。知此稱號。妄行編
載。事屬已往。今亦不加深究。其所稱貝子被魔鬼拉
入地獄。皆係憑空捏撰。毫無影響。似此造作無稽。充
其伎倆。尚有何言。不可出諸口。何事不可筆之書。若

不及早嚴行禁止。任令傳播。設其編造之語。悖謬更有重於此者。勢不得不大加懲辦。與其日後釀成巨案。莫若先事豫為之防。前諭令派出管理西洋堂事務之大臣。祿康等。共同議立章程。隨時稽查。茲特指出書籍所載各條。指示申諭。嗣令旗民人等。務當恪守本朝清語騎射。讀聖賢書。遵守經常。釋道二氏。尚不可信。况西洋教耶。亟應消除舊染。毋再聽信邪言。執迷不悟。背本從邪。自不齒於人類。有負朕諄諄訓誡至意。○十一年

諭前因佟關保兄弟。以現任職官私去頂戴。在城外飲

酒滋事。當經從嚴懲辦。並明降諭旨。令旗員子弟等務各謹慎自愛。以飭官方。乃甫閱數月。復有倫布在街揪扭。並不戴用頂帽之事。積習相沿。殊為可惡。若不申明例禁。仍恐不肖之徒。不自檢束。必有復蹈故轍者。嗣後現任文武大員。以及職官。如有私去頂戴出外行走之事。是已不以職官自居。一經查明叅奏。即降旨示懲。僕復另有游蕩滋事情節。即著先行革職。再俟究辦。即宗室王公。不自檢束。竟有私行游蕩之事。亦照此例辦理。自此次訓諭之後。各宜顧惜名器。慎毋侮辱。以副朕教誨諄諄至意。○十三年

諭。我朝自開國以來。凡八旗滿洲蒙古漢軍人等子弟。俗尚淳良。咸臻樸茂。累世相沿。已非一日。乃近年之中。旗人風氣日漸澆薄。居恆在家。率皆不務弓馬。徒以游惰驕奢。愈趨愈下。其不肖者。動輒於歌場酒肆。恣意游蕩。並或設局聚賭。稍有睚眦。即逞忿持刀相向。以致將國家養贍衣食之資。盡成蕩費。生計日形其艱。而輕蹈王章者。愈見其衆。竟有敢於行營切近處所。持刀傷人斃命之事。甚而至於兇惡蔑倫。復有如本日法司衙門審訊馬甲雙喜因瘋殺死伊母舅。並扎傷伊母陳張氏等。問擬斬決一案。閱之實堪駭。

異。試思明倫敷教。孝弟為先。該旗人於根本之地。尚復漸滅天良。何暇他責。推求其故。皆由朕不能教導。八旗所致。然朕日理天下。庶政實繁。八旗俱簡任王大臣管理。皆不能實心化誨。平日罔知訓迪。不能禁於未發。旗人等身罹罪網。責有攸歸。即王大臣中頗有持正者。惟知以挑缺派差等事。不徇情面。即謂克稱厥職。殊不知探本求源。更有重於此者。至若參領佐領等官。於旗人更為切近。尤當隨時加意化導。力挽頹趨。乃亦視為故常。若罔聞見。則從前敦龐純固之風。何以使之漸復。而朝廷設官立教。其義安在。除

將該犯雙喜著即於該旗教場地方斬決梟示外。所有八旗都統副都統前鋒統領護軍統領等俱著傳旨申飭。嗣後務當督飭所屬參佐領及各營官員均須實心訓導。俾旗人等革薄從忠。痛除積習。以副朕諄諄誥誡之至意。○又

諭朕恭閱

聖祖仁皇帝實錄內載康熙十二年十二月辛丑

召八旗都統副都統及六部滿洲尚書等諭曰。滿洲乃國家根本。宜加軫恤。近見滿洲貧而負債者甚多。賭博雖禁。猶然未止。皆由都統副都統佐領下不勤加

教諭之所致也。且滿洲習於嬉戲。凡嫁娶喪祭。過於糜費。不可勝言。爾等若能各修厥職。不負委任。禁嬉戲無益之事。勸善懲惡。則自感化矣。

訓諭煌煌。至為明切。敬惟我

聖祖謨烈光昭。

功兼創守。彼時開國之初。風氣淳樸。在廷滿洲大臣。教誡八旗。如清語騎射。尚能勤加習練。遠勝今日。而仰

繹

孜孜求治之懷。猶因稍涉浮靡。

飭令力加檢束。迄今又閱百數十年。八旗生齒日繁。支

絀情形較前既甚。而都統副都統等才具又遠遜前
人。朕宵旰焦思。曷能或釋。前經節次籌增養育兵用。
贍身家。凡所以鞠謀而保聚之者。已無微不至。並疊
經通諭八旗都統等。令各留心化導。務習本業。若果
能恪遵教誡。自不難將積習漸次消除。無如誨之諄
諄。聽之藐藐。近日旗人中。尚有以恣意游蕩犯科者。
一經嚴飭。該都統輒以引過了事。實屬有負委任。嗣
後著各該都統衙門。將此旨恭錄一道。敬謹懸挂。以
期觸目儆心。該都統副都統等。務須懍遵訓詞。率屬
實力奉行。毋得視為具文。用副諄切訓誨之至意。○

十五年

諭朕恭讀

世宗憲皇帝實錄。雍正四年二月辛卯欽奉

諭旨。朕常飭八旗大臣。八旗為本朝根本。凡係生計禁令習俗等事。屢經申降諭旨。從前

皇考之時。恩賞稠疊。歷經多年。而滿洲等生計。並不見其滋植。轉益減損者。皆法令懈弛之故也。今八旗兵丁貧乏。即將倉糧國帑。盡行頒賜。朕固不惜。但使隨得隨盡。曾不浹旬。遽即蕩然。亦何濟之有。並有原置房產。變易無遺者。若於此輩。加以顧惜。不但惡者無

所懲。即善者亦無由勸矣。凡此不肖人等。各參領佐領。理宜痛加懲治。如終不悛改。即應革退。以為不肖者戒。大臣等果能視兵如子。懲惡獎善。並責令參領佐領等不時教導。何事不成。今大臣等但知不通賄賂。不徇情面。以校射為要務。勤以操練而已。不知爾等職任。正不止於此也。必教以典禮倫常。及治生之計。俾各好善惡。崇儉戒奢。方可謂教育有成。嗣後大臣及參領等。痛加勉勵。竭誠管理。不可仍前粉飾等因。欽此。

聖諭煌煌。所以責成管理旗務大臣等。董率八旗者。至

為明切。乃閱今數十年後。法令益覺懈弛。習俗更加
敝壞。八旗兵丁。不知勤苦上進。錢糧恩賞。隨得隨盡。
逞一時之揮霍。而不顧終歲之拮据。快一己之花銷。
而不顧全家之養贍。致有房產變易。生計蕩然。風氣
改移。仍與當日無異。而現在管理旗務之王大臣。因
循怠忽。意存膜視。朕屢經諄切訓諭。仍復疲玩如故。
伊等近日辦事。於賄賂一節。或尚不敢肆行無忌。至
於瞻徇情面。已恐不免。求其以校射為要務。勤加訓
練者。更屬寥寥。若望其視兵如子。懲惡獎善。教以典
禮倫常。及治生之計者。竟無其人矣。試思八旗都統

以及參領佐領等官。層層管束。最為切近。如果認真體察。何事不可周知。即如前日御史西琅阿所奏山東民人。有專典八旗兵丁錢糧。盤剝生計者。該旗員等早應聞而查禁。又何待御史之條奏耶。嗣後八旗都統等。務當各夫蓋誠。盡心職守。視國事如家事。實力誨導。嚴加查察。並隨時分別懲獎。俾兵丁等共知。肅除惡習。崇儉戒奢。庶生計日饒。懍遵法度。如經此次訓諭之後。仍不加息整飭。以致舊俗日壞。朕惟管理旗務之王大臣等是問。○又

諭。朕恭閱

世宗憲皇帝實錄內載雍正五年

諭各都統等以八旗人員乃國家根本。養育教誨。不可少懈。佐領者乃統轄一佐領之人。俾佐領下人等皆不失生計。不染惡習。養之教之。使趨於善。爾等宜為國家宣力。正己率物。獎勸懲戒。勉習文武之業。欽此。仰見我

皇祖訓勉周詳。樂育八旗人材至意。當時風俗人心尚屬淳樸。猶恐漸染澆漓。不習於善。

特命管旗各員。勤加勸懲。迄今又將百年。八旗子弟。大半沾染習俗。而該管官又不實心化導。隨時約束。將

何以使之遷善遠過。漸返敦龐乎。八旗滿洲一佐領下。多不及數百人。戶不過數十家。其居址雖不盡毗連里巷。而散處較遠者。亦止在數十里之內。該都統副都統。猶如外省督撫。參領佐領。猶如兩司道府。驍騎校。猶如州縣。試思州縣所轄地方。遼闊。戶口繁多。尚應周察無遺。豈一佐領下人。轉難管轄。惟在該管官平時留心稽考。孰為安分守法。有志嚮上。孰為不守正業。怙惡不悛。申詳參領都統。分別勸懲。則善者益樂為善。即不肖之徒。亦知懼而不敢為非矣。至於參領佐領驍騎校。如果實力奉行。著有成效。該都統

等亦當酌量保薦。予以優獎。如有怠職者。即據實叅處。毋稍迴護。庶旗人等共相做勸。漸摩嚮善。蒸蒸日上。朕實有厚望焉。○十六年。

訓諭八旗簡明語。八旗子弟。國之世僕也。百有餘年。英才輩出。不可勝紀。然生齒日衆。閒有失於教訓之子弟。又遇不肯為國家作養人才。止知尸祿保位之都統副都統。加之以作姦犯科。開局哄騙之莠民。以致趨於下流。甘為卑汙。如蛾投火。不知改悔。惟圖片時逸樂。罔恤一世身家。深可憫也。姦匪根徒。多方引誘。最可恨者。無如聚賭。蓋開局之惡棍。其意總在斂錢。

受其愚弄。昏迷不覺。誠可哀也。好賭之人。其弊有五。為我八旗子弟言之。食祿於朝。罔知節儉。妄希恩澤。終至困窮。其弊一也。上不能供父母之甘旨。下不能顧妻子之飢寒。其弊二也。學文習武。俱缺資本。終為無用之人。其弊三也。一入賭局。有敗無勝。典賣之物。既窮偷竊之心。頓起。其弊四也。偶為鼠竊。未犯王章。膽益放恣。卒致身名皆喪。其弊五也。此五者。賢者必不犯。不肖必不改。持書此數語。誡告八旗。務令家喻戶曉。爾都統副都統七十餘員。何忍視國家有用之子弟。半為無用之匪徒。不為朕加意訓導耶。諸臣中

能盡一分心力。國家受一分之福。八旗子弟。觀朕此旨。能翻然改悔。日引月長。皆復舊習。成佳士。誠國家之大福也。若諸臣中無一人盡心盡力。八旗子弟無一人翻然改悔。是國家之大不幸。此篇文字不必存。朕亦不再饒舌矣。○道光三年奏准。嗣後旗人充當杆兒上頭目者。由八旗都統一體嚴查飭禁。○

十八年

諭奕顯將前鋒校吉慶名帖送交功普。浼求揀選佐領。功普身任侍郎。與奕顯同堂共事。並無統屬。何至甘受指揮。奕顯功普革職。發往盛京效力贖罪。嗣後各

部院八旗及大小各衙門堂官。總當消除積習。持正秉公。概不准瞻徇人情。儻經此次諄諭之後。再有蹈此覆轍者。經朕查出。或被人糾參。定將該堂官加等治罪。決不寬貸。○十九年

諭。嗣後前鋒校護軍校以下人員。凡遇引見射箭時。穿用布袍布鞋。該管大臣尤當隨時訓誡。崇儉抑奢。儻競尚浮華。致荒本業。定將該管大臣一併嚴懲。

欽定大清會典事例卷一千一百四十八

八旗都統

公式 守制 終養 留養 患病

守制。順治年間定。旗人遇父母之喪。持服百日。過繼之子。為本生父母。持服百日。為親伯叔。父母親兄弟。妻及已婚之子。養母慈母。皆持服兩月。為親伯叔祖。及伯叔祖之子。親伯叔之子。親弟兄之已婚子。親嫂。及子媳。已婚之孫。生子。庶母。皆持服一月。為親伯叔祖母。親伯叔祖之子。媳。及孫。親伯叔父之孫。親弟婦。親伯叔之子。

媳親弟兄之子媳及親孫之媳皆於送殯後七日當差為族人於送殯後當差。○雍正元年議准旗人祖父母父母故者持服百日。親伯叔父母親兄弟並妻及已投室之子持服兩月。親伯叔祖父親嫂親伯叔之子及已投室之孫持服一月。親伯叔祖母親弟婦親伯叔子之妻出殯後持服七日。宗族故者出殯後當差。○三年覆准在外旗員丁憂據該督撫揭帖開缺其該旗行督撫司道各印結不得給該員家人齋送。限十日咨部由部轉發該督撫令回旗守制。○乾

隆二年覆准各駐防旗員。如父母在京故者。該駐防處大員代為具題報部。由部給假百日。回京治喪。除往返在道日期不計外。百日假滿。具呈該旗咨部銷假。仍回原任。○又奏准世爵官佐領遇親喪。百日後仍引。

見承襲。○又議准文武旗員。如遇親喪。咨部註冊。百日後入署辦事。照常支俸。朝會祭祀均免執事。二十七月內除奉

特旨升用外。其餘論俸推升之處皆停止。服闋仍准積算前俸。○三年覆准八旗護軍馬甲等於親

喪二十七月內。遇有前鋒校等缺。准其揀補。○
四年議准。旗人任京外官員。如遇祖父母、父母、
及所後祖父母、父母、故者。皆呈該管官准假。其
武職如遇親喪。應暫停升者。報兵部。○五年奏
准。八旗文職丁憂並服闋者。該員以聞。訃服闋
之日。呈參領、佐領。其現任筆帖式及候補文職
各官。於本月三十日截限。以前具冊報部。考試
取中及各項候補筆帖式。現在註冊應用人員。
於每月十五日截限。以前具冊報部。若事在截
限以後者。各展限五日。

盛京

陵寢等處及駐防所有文職亦令本人以聞計服闋各日期呈報該管官限十日內咨部如本人不即呈報及該佐領等轉報遲延者皆交部議處○又奏准駐防大小各官遇親喪給假回旗者係將軍都統以副都統護印代題係副都統由將軍都統代題不與將軍同城者仍由將軍委官護印均一面具題一面回旗其天津都統後及無將軍統轄之副都統委官護印咨兵部具奏俟署理官前往交代後來京至無大員管轄之

總管城守尉等官。委官護印。報部回旗。餘官均由該管官委官署理。均一面報部。一面回旗。其給假治喪。仍如舊例。各官之扶柩歸葬者。亦如之。○十一年定。八旗在制之護軍前鋒領催執事人等。遇七品城門吏缺。著一例升補。如再遇應升。未服闋者。仍停升。○又奏准。出繼之子。其本生父母身故。持服兩月。親伯叔父母。親兄弟。養母。慈母。妻。已授室之子。皆持服一月。同居治喪者。兩月。同曾祖之伯叔祖父。伯叔父。有子之庶母親伯叔之子。親嫂。親兄弟之子。已授室者。

已授室之孫。皆出殯後七日當差。同曾祖之伯
叔。祖母。伯叔母。兄弟。同祖兄弟之妻。若子親兄
弟之子。親兄弟之子。婦。曾孫婦。皆出殯後當差。
族人故者。不在持服之例。○又議准。官員服制。
除父母之喪。應持服百日外。其餘喪服。皆不得
藉名為偷安之計。養子於本生父母之喪。服制
既降為期年。亦應改為持服兩月。剃頭當差。親
伯叔父母親兄弟妻。已授室之子。撫養庶母。原
定持服兩月者。改為一月後。即剃頭當差。此一
戶內。如有承辦其事者。仍照常持服兩月。親伯

叔祖親伯叔祖之子親伯叔之子親兄弟投室
之子親嫂親子婦娶妻之孫生子庶母原定持
服一月者。今定於出殯七日後剃頭當差。親伯
叔祖母親伯叔祖之子婦親伯叔祖之孫親弟
婦親伯叔之子婦親兄弟之子婦親孫婦原定
出殯七日當差者。今定於出殯後剃頭當差。無
服族人原定出殯後當差者。今定不准持服。照
常當差行走。凡大臣官員持服日期。其職任官
差各異。應行令各地方各量職任。於其應行走
之時。即令當差行走。○又奏准在京旗員為祖

父母承重者。一例守制。○十八年奉

旨。旗員原無二十七月停升之例。後經議准施行。但旗人補用旗缺。非文官外任可比。理應照舊遵行。嗣後旗員補用。內外文官。外省綠旗武弁。仍丁艱二十七月。停其升轉外。京城武弁。各省駐防。

陵寢旗員。補用旗缺。皆照舊例。將職名進呈。二十七月內。毋庸停其升轉。○二十四年

諭。嗣後凡八旗外任文武官員。調任及丁憂回京者。俱著在原衙門職任。及所調之任行走。遇缺即行補用。所有期滿補用外缺之處。著概行停止。○又覆准旗

員承重丁生祖母憂者。回旗守制。○二十六年諭滿洲官員。丁憂後閒散安居三年之久。既無得項。又無差使。人亦漸至衰委。著百日孝滿時。由侍衛升補者。即在侍衛上行走。其由前鋒護軍營旗下參領等官升補者。即於本營行走。○三十一年奏准。凡候補人員及未經到任得缺者。丁憂後百日孝滿。毋庸帶領引。

見仍照舊例補用。○三十二年

諭滿洲蒙古人員內。由道府等官丁憂回旗者。與漢員不同。漢員丁憂回籍。必待二十七箇月服闋。始以原

官補用。滿員則滿百日後例應行走當差。既令在原衙門分別補用。即有俸精飯銀足資養贍。非家居持服者可比。原不應復照漢員一體起復銓補。但思伊等曾任外省。於地方事務自較熟練。且現在遇有道府缺出。除授需人。著吏部將各衙門由道府服滿改補京職人員查明帶領引見。如有堪勝外任者。交軍機處記名。俟請旨缺出。開單進呈。候朕簡用。其服滿同知通判州縣等官。亦著該部帶領引見。如果其人仍堪外任。即交部照例銓選。○三十七年奏准。軍營辦事人員。遇有父母在旗病故者。即以該員父

母身故之日起。扣算服滿。該員回京後。止令穿孝百日。毋庸再扣二十七箇月。亦毋庸停升。○

四十一年

諭滿洲蒙古人員。由道府丁憂回旗。已滿百日。在部行走者。俱於每年十月內帶領引見一次。至滿員內曾任丞倅州縣丁憂回旗。在原衙門行走者。著吏部查明。亦於每年十月內帶領引見一次。○四十二年

諭武職滿員副將以下。丁憂服闋病痊等事。回京改用京職者。著兵部於每年年終帶領引見一次。候朕酌量記名簡用外任。其不記名者。下次即無庸再行引

見。○四十四年議准。凡邊俸未滿。以及未經實授得
缺。尚未到任人員。遇有丁憂事故。回旗後應俟
百日期滿。即由該旗咨報吏部。如有原衙門可
歸者。即令其在原衙門行走。如無原衙門可歸。
及原衙門無相當之缺者。由部籤分各部院衙
門行走。俟該員服闋之日。該衙門即令離任。咨
報吏部。給予執照。令其仍赴原省候補。○嘉慶
五年奏准。八旗現任。及各項候選文職官員。呈
報丁憂。本員於親故及聞訃之日。即呈明參領
佐領。該參領佐領於本員丁憂五日內。先行出

具圖片報部。仍呈明該旗。該旗於據報十日內。咨明吏部。遲延遺漏者查議。○又奏准八旗外任人員。父母在旗病故。該家屬於遭喪日。即呈報該參領佐領。該參領佐領於本員丁憂五日內。出具圖片報部。仍呈明該旗。該旗於據報十日內。取具旗結七張。咨報吏部。由部行文該員任所督撫。將結六張封發查照。該督撫接到部文。即飭該員回旗守制。仍將該員聞訃日期咨報部旗。○又奏准八旗外任官員。父母在旗病故。丁憂者。督撫以下道府以上。本旗自行具奏。

奉

旨後知照吏部。吏部毋庸具題。照例咨行。其同知以下。據咨開缺。仍入半月彙題。○又奏准八旗現任及各項候選文職官員呈報起復。如見喪丁憂者。以親故之日計起。聞訃丁憂者。以聞訃之日計起。扣算服闋。令本員於服闋之日。即呈明該參領佐領。該參領佐領於本員服闋五日內。先行出具圖片報部。仍呈明該旗。該旗於據報十日內。咨報吏部。不得於未服闋之先。及原行走之衙門呈報。如先期呈報。及遲誤者。查議。○

道光元年奏准。凡官員遇生祖母病故。其父先故。別無父同母之伯父及伯父之子。該員於生祖母為長孫者。如嫡祖母現存。仍照例離任治喪一年。如嫡祖母已故。飭令承重丁憂三年。○十一年奏准。八旗外任實缺人員。父母在旗病故。如適遇截缺之期。該家屬於遺喪之日。呈明該參佐領。即行出具圖片報部開缺。遲延者照例議處。

終養。○乾隆元年奏准。直省武職及駐防官。遇祖父母父母老疾路遠不能迎養。且家無次丁。

者。許其呈報該管官。出具印甘各結報兵部奏請終養。○五年議准。嗣後滿洲蒙古官員。除在京文職俱不准告請終養外。其有補授外任滿洲缺。如

盛京五部司員筆帖式並

陵寢官員。奉天甯古塔黑龍江等將軍衙門。以及船廠烏拉齊齊哈爾。並驛站關口章京筆帖式。各省駐防將軍城守尉。督撫隨印筆帖式。及理事同知通判。其補授外任漢缺。如督撫布按道府等官。遇祖父母父母年七十以上。子孫俱出仕在

外。戶內並無次丁。或有兄弟篤疾不能奉侍。或
母老雖有兄弟同父異母。及父母至八十以上。
雖家有次丁。而願請歸養者。准其呈報該管上
司。題奏到日。由部行令該旗出具確實印結報
部。照漢官之例。一體終養。○又議准滿洲蒙古
候選候補外任滿缺。如有情願呈請終養者。停
補外任。○六年覆准旗員應升外任。有祖父母
父母老疾家無次丁者。呈報該參領具結申報
都統具奏。咨兵部註冊停升外任。○九年奏准
八旗外任官祖父母父母年老例得終養者。由

部行知本旗覈實具結報部。准其回京引

見。如奉

旨以旗員改補者。該旗遵

旨辦理。俟起用時將該員年力衰壯咨部辦理。如佐
雜做員無改補之職者。於本旗應當之差。准其
選充。起用時仍咨部以應得之官用。○又奉

旨。向例官員告終養者。俟養親事畢方得補用。但旗人
回京。與漢官回籍者不同。或在旗在部皆可補用。以
供驅策。永泰到京。著該處帶領引見。請旨。嗣後旗員
告終養者。悉照此例行。朕思旗員現有老親。銓選赴

任二三年內即請終養。曷若於臨選之時。令其自揣。難以久任。即將親老緣由。向該部具呈轉奏。不必補用外缺。但恐因此或生趨避之弊。其如何定例之處。該部妥議具奏。欽此。遵

旨議定。旗員補用外任。除

陵寢東三省官員筆帖式。各省駐防將軍城守尉督撫。隨印筆帖式等。告請歸旗終養者。仍照舊辦理。外。其滿洲蒙古現任藩臬道府同知通判州縣。以及滿洲蒙古理事同知通判等官。如遇祖父母父母年老例得終養者。照例題奏。由部咨查。

該旗具結報部。令其回京。各該處帶領引

見請

旨遵行。至漢軍外任官員。從前告請終養者。俱係照漢例辦理。嗣後漢軍外任各官告請終養者。亦照此例。令其回京。各該處帶領引

見請

旨。此等滿洲蒙古漢軍告終養外任各員引

見時。除奉

旨。以旗員調用。及奉

旨。指明以何部何官即用者。俱欽遵辦理外。如奉

旨以京職改補者。均由部按照品級分別開列改補。至現任京職應升外任各員。吏部於將屆應用之前。每項按人數多寡。截取數員。咨查該旗令其自揣。如有親年衰老不能久居外任例得終養者。即於該旗呈明。取具確實印結。咨部轉奏。停其補用外缺。仍在現任京職上行走。如係滿洲蒙古閒散科甲候選知縣者。以應用科甲小京官。照科分名次補用。漢軍候選知縣之間。散進士舉人。告請終養。在京無應用之缺。應照現任知縣告請終養之例。以七品筆帖式補用。○

十年

諭朕前因旗員終養回旗原與漢人回籍不同是以降旨嗣後終養之員令各該處帶領引見量與差使此朕體恤旗員之意也但前旨內有嗣後字樣則該部辦理在奉旨以前者不得帶領引見一體邀恩著吏部查明奉旨以前如有終養之員亦著各該處帶領引見。○三十八年奉

旨嗣後八旗升選官員如實係親老不能遠離者得缺後許其呈報該部聲明緣由帶領引見候朕臨時酌量或以旗員或以部缺改用俟該員養親事畢仍照

伊原得之缺坐補。著為令。○四十二年奉

旨。旗員向無終養之例。我滿洲從來淳樸之習。但知尊君效力。家計有所弗顧。即外任有因親老情願回旗者。原不妨據實呈明。該上司回京當差。候朕酌用京職。既得遂其私情。又有俸祿養贍。若照綠營之例。回京閒住。轉屬非是。而其人不得俸祿。亦必致艱窘。如該員養親事畢。仍得外用。則旗人更不應如此存心。伊等外用原係特恩。豈可因此希圖戀職。沾染外官習氣。設使奉派出差出兵。伊等亦得因親老呈請終養乎。嗣後旗人終養之例。著停止。其有親老情願回

京者。准其呈明督撫奏明送部引見。文員以部屬用。武員或用侍衛。或用旗員。候朕酌量降旨。○四十九年

諭嗣後各旗文武官員。如有父母年至七十五歲以上者。均不准保送外任。庶旗員共知祿養承歡。克敦內行。亦移孝作忠之一道也。欽此。遵

旨議定。除八旗現任官員有親老者不准外用。其各旗候補候選人員到班時。行查各旗。如有父母年在七十五歲以上者。停其選補外任。各按品級以京員改補。○嘉慶五年奏准八旗官員無終

養之例。凡父母年至七十五歲以上者。均不准保送外任。其有先經外任。後因父母年老呈請回旗侍養者。該督撫出具印結到部。改補京職。漢軍佐雜人員。亦照此辦理。其候補候選及捐納外任官員等。家有兄弟侍養者。不必概令改補京職。如有選期到班。呈請留京侍養者。亦照例以京職改補。

留養。○乾隆元年奏准。駐防兵丁有祖父母。父母年老而家無次丁。欲將伊子調回。或伯叔父母無嗣。欲將兄弟之子調回養贍者。均令該族

長佐領覈實具結咨部。准其退伍調回。至同胞兄弟以無子嗣。呈請回旗。概不准行。○五年奏准。直省駐防各官老病告休。緣事革職。或降調。年老不願補官。並革退之兵丁。京中雖有子孫不足養贍。而外省有子孫兄弟。及兄弟之子居官當兵。或家人當兵。願留養者。呈報該都統咨兵部。准其留養。無職之人。准其就養。其在京休致革退官兵。概不准就養外省。○又奏准。各省駐防已故官兵之妻。有子弟家人已經當兵。足資養贍者。准其留養。○又奏准。已故官兵之妻。

在駐防處依子弟當兵度日。如在京有子弟居
官當兵。呈請迎養者。准其迎養。其弟兄之家口
不准偕回。○又定。八旗官兵年逾五十無子。又
無兄弟子承祧。呈請願將兄弟之孫自外省調
回者。准其調回。○又定。駐防兵丁內向有父母
兄弟在旗。後因年久戶絕。呈請回京守墓者。准
令一人同家口回京承祀。○八年奏准。

陵寢總管翼領防禦病故。其子弟在京置有產業。情願
回京者。查明送回。如無產業不能回京。情願在
彼處當差者。准留彼處。仍將緣由報明該旗。○

二十年議准。嗣後滿洲蒙古漢軍人員。有子姪外任懇請就養者。照旗員子姪隨任之例。詳明督撫。該督撫覈實咨明部旗。吏部行文該旗。查明有無當差之處。如並未當差。准其留任就養。仍於年終彙奏。○四十七年奏准。旗員父兄在京呈請隨任就養者。均由該都統奏明咨部辦理。○嘉慶八年議准。各省駐防官員。因祖塋無人看守。呈請回京者。由該旗查明果係獨子。京中並無看守墳墓之人。方准令回京。其雖非獨子。而京中實在無人看守墳墓。止准撥一人回

京。

患病○康熙六年

諭。八旗世職官因病請將職替與子弟者。令吏兵二部傳驗患病真偽具奏。○十二年題准。官員老病請解任者。二品以上自陳。五品以上兵部題請。六品以下咨部查驗解任。○二十二年覆准。凡世職及有職任官員。及王等屬員患病告退者。該都統。副都統。長史等驗實咨部。准其解退。若詐稱患病告退者。革職。有世職者。令應襲之人承襲。若係本身所得世職。亦令革去。其徇情具報之

該都統副都統長史等俱降二級。罰俸一年。至前鋒參領護軍參領前鋒侍衛及有世職之侍衛藍翎護軍校等。若有詐稱患病告退者。與不行詳查之該管官。俱照此例議處。○二十八年

諭。八旗參領佐領有職任之官。多有以疾告休者。此中亦有不能騎射。畏憚而求罷者。夫管轄職任。仍須得舊人為佳。其傳諭八旗都統副都統等。嗣後若此告休者。詳察之。果疾病不可支者。允其休可也。若雖不能利於騎射。而能管轄者。仍留用之。○雍正七年

諭。嗣後凡痼疾官員。奏請革退者。伊等如有效力之處。

著於摺內聲明。○八年

諭。凡在京年老辭職之旗員內。有在行間效力年久者。於辭職具奏之日。朕悉閱看。有應加恩者。朕即加以恩施。嗣後各省駐防處官員內。有在行間效力年久之人。因年老辭職具呈者。著該將軍等於具奏之時。將伊食俸餉之年。及在行間效力行走之處。聲明咨送兵部奏聞。候朕閱看。有應加恩者。加以恩施。現今因老辭職之鑲紅旗協領駱達子。亦屬武職內效力之員。著以原品休致。給以半俸終身。○乾隆五年奏。准內外旗員患病。該管大員委員確驗。酌量給

假不得過六月。如過六月未愈。有職任者開缺。如世爵。停支俸祿。病痊之日。呈該都統隨旗當差支俸。無世爵者。候缺補用。○三十六年議准。凡內外世襲官。因病告假已過六月。仍照例停俸外。停俸至一年後調治未愈。不能當差。實係殘廢者。即行開缺。揀選應襲人員。奏請承襲。如無應襲之人。該管大臣查明請

旨辦理。○四十四年

諭。嗣後病痊起復人員。俱著該旗帶領引見。候朕臨時降旨。如果人去得。清語習熟。騎射可觀。朕即以綠營

之缺錄用。不必令其守候原缺。著為令。○四十七年諭。凡旗人由外任患病自行呈明回旗。身有世職者。著該旗詳驗。如係不能當差。加恩將世職仍留本身。賞食全俸。若不自行具呈。經上司勒休者。即有世職。亦毋庸給俸。著為令。○四十九年奏准。各旗如遇提鎮大員病痊起用者。照副將以下等官例。由該旗帶領引

見。○五十年

諭。嗣後回旗病痊武職各員。如有奉旨以旗員用者。不必年終復行帶領引見。○嘉慶八年議准。武職旗員

自提鎮以下。病痊起用。及丁憂終養起復。均由都統咨送兵部帶領引

見。○二十四年奏准。嗣後遇有提督總兵病痊起用。旗員身任綠營者。由該旗都統等驗看咨部。由部知照軍機處。令該員具摺請

安候

旨簡用。○道光十八年

諭。嗣後各省武職旗員。自副將以下病痊。由部帶領引見時。著該部照文職例奏請坐補原缺。如調用別項之處。候旨遵行。其有赴該旗自行呈請願改京職者。

著不准行。所遞原呈。該旗亦不准接收。○咸豐三年
奏准。嗣後八旗滿洲蒙古漢軍旗人。遇有因病
失迷。或無故逃走。自行投回。情願出力報效贖
罪者。仍令回旗充當苦差。雖無養贍。不准作為
養育兵。○同治元年奏准。嗣後告病回旗各員。
奉有

諭旨。因軍務發往各省差委者。俟該部奏聞後。即遵
旨前往。毋庸先行引

見。以期迅速。俟差委事竣。再行赴部補行帶領引

見。○四年奏准。身兼世職提鎮大員。曾在軍營帶兵。

因病回旗者。仍留本身所兼世職。○八年咨准
鑲白旗滿洲候補筆帖式文正。銓選鴻臚寺筆
帖式後。旋據該員圖報患病開缺。今復報捐指
選六部。係屬取巧。嗣後例應坐補之筆帖式各
員。如有報捐分部分行走。及指六部者。照蒙混例
議處。

欽定大清會典事例卷一千一百四十九

八旗都統

公式

外任歸旗

姓氏命名

外任歸旗。康熙四年議准。漢軍外任各官。如遇革職解任及身故。其子孫向在任所者。均著速催回旗。雍正三年奏。旗人外任官員。遇有升轉降革。應回本旗者。視其程途遠近。嚴定限期。其有驛站之大路。令其日行一站。其無驛站紆遠之路。令其日行七十里。將起程之日報知該部。該旗以憑查覈。如有遲延留滯。不即進京。

或身雖到京而留家屬於外者。令該地方官報知督撫查叅。交部照例議處。奉

旨。這所奏內議將應行回旗官員遇無驛站紆遠之路。令其日行七十里。未免迫促。著改為五十里。○又議定。外任旗員子弟至十八歲以上者。不令帶赴任所。其未至十八歲者。具呈該都統存案。至十八歲悉令歸旗。○四年奏准。外省駐防官兵內有亡故及革退者。例將其寡婦及家口解送來京。每有到京未久。託故告假而去者。亦有因無所依附。具呈回去者。且送到之家口。多有與丈

內開載之數目不相符合者。嗣後駐防官兵之寡婦及革退人等。若有子弟已經披甲。足以養贍。而京中並無產業親族者。令該將軍等詳查確實。准其留於彼處。若無子弟在彼披甲。實無養贍情願來京者。即令其解送回旗。該管官務將家口實數查明。填寫花名。出具保結申報。該將軍等復行詳查。交與解送官兵。令其嚴加約束。毋致生事。照例給予口糧船隻車輛。於勘合內明白填寫。到京之日。該旗查明報部。給發回文。其已經來京歸旗者。概不准藉端告假復回。

原處再家口人等於途中有死傷逃走者解送
官即報該地方官將情由註明黏於勘合之後
若人口數目不符多支口糧者該旗查出即行
題參將該將軍大臣官員及解送官一併交部
察議○五年

諭盛京人員習氣澆薄營謀鑽刺朋比侵盜甚是無恥
屢加教誡終不悛改皆因犯法叅革究治之後仍在
本地居住往往生事滋擾誘人為非無所不至此等
敗類若不即令遷移望風俗之歸於淳厚終不可得
嗣後盛京居住滿洲蒙古漢軍文武官員除因公註

誤獲罪者。仍准本地方居住外。其犯侵盜虧欠錢糧及姦貪訛詐之事降革者。酌其所犯事由。或令來京歸旗。或著於各省滿洲駐防之處安插。如此則不肖之徒漸少。而盛京澆薄之習可息。嗣後凡遇盛京人員犯罪案件。俱照此定擬。○六年

諭。旗人首重武藝。即文員子弟。亦不可棄而不學。今鑲白旗漢軍襲職家譜內。原任道員王希舜之子。並伊兄之子。俱隨在伊任所。夫有一人。必需家人二三名。以供使令。秦養許多家口。如何能作清官。不為私事所牽。聖耶。且伊等子弟。隨往任所。亦惟圖安樂。倚仗

伊父伯叔聲勢。妄行擾害地方。習為不肖而已。何能成就上進。今漢軍內不得可用之人。日流而下者。皆由於此。若年幼子弟。理宜帶往任所。其十八歲以上之子弟。習武者。宜留在京師。令其披甲習馬步射。效力行走。習文者。當令在官學讀書。成就其材。若將長成之子弟。帶往任所。並不教以文學武藝。任其安閒怠惰。習為不肖。即使捐納得官。亦一無用廢材。有何益處。嗣後凡旗人赴外任者。將帶往族人之處。永行禁止。有願將十八歲以上之親子帶往者。著將緣由呈明該都統具奏帶往。再各省驛丞典史等雜職。於

旗人不宜。或係素有志量。思竭忠誠報效國家之人。限於未員。無由宣著。反致遏抑。或不肖之徒。規避旗差。捐納雜職。圖往外省。其該管官以伊係旗人。故為寬容。該旗大臣。又因其外任不行查察。兩無管束。伊得乘間久留在外。甚屬無益。可惜旗人徒致廢棄。著將文武雜職內幾品以上。應用旗人幾品以下。應用旗人之處。議奏。欽此。遵。

旨議定。外任旗人無論大小文武官員。永不准將旗人帶往任所。若係親子十八歲以上。亦不准其帶往。有情願帶往者。聲明緣由具呈該旗大臣等

奏請遵行。其未至十八歲年幼之子。願帶往任所者。稟明該佐領參領該旗大臣。將年歲註冊。准其帶往。俟至十八歲時。仍送回該旗。其現任外官有帶往族人及十八歲以上子弟者。俱行撤回。俟文到日。該督撫量其路程遠近。照例勒限回京。習文者該旗送入官學讀書。習武者挑選披甲執事人。令其當差行走。若另有情由願留任所者。該督撫行文該旗具奏辦理。儻有違例帶往。並隱瞞年歲留在任所不勒令回旗者。或經該旗查出。或被旁人出首。將本員及不行

查出之該管官。一併交部治罪。再外省文武雜職。品級卑微。實不宜用旗人。請將京城巡捕三營。熱河等處千把總。各部院雜職官員。仍照常補用外。其外省文職自縣丞以上。武職自衛千總以上。准補用旗人。其主簿典史巡檢驛丞倉庫大使千把總等雜職。除係

特旨補用外省千總外。餘俱不准補用旗人。其現任者照舊留任。缺出裁汰。永為定例。○七年

諭嗣後歸旗人員。有逾限逗遛在外。應行枷號者。著按其逗遛年月之多寡。以為枷號之期。若逗遛一年。即

加號一年。照此計算。儻另有生事犯法之處。從重歸結。永著為例。○十年

諭。旗員子弟久隨外任。不但伊等安逸游蕩。荒廢無成。而在署干預地方之事。每壞伊等父兄聲名。是以從前議定外官子弟十八歲以上者。悉令歸旗。或讀書肄業。或披甲食糧。使之各有成就。不至廢棄。此朕教養之恩也。至伊等子弟中有可以助其父兄辦理事務。或另有情節不能相離者。朕原准奏聞請旨。而道府以下官員不能自達於朕。亦有督撫代奏之例。今太原府知府劉崇元。將伊姪劉庭照私留任所。不令

來京。涇陽縣丞羅思哈將伊子什勒誑稱年歲未及。不行咨送。似此怠玩功令之員。不可不加懲戒。劉崇元羅思哈著解任送伊子姪來京。該旗大臣奏聞請旨。著將此旨通行曉諭八旗。嗣後儻有不行奏聞而私留子姪在任所者。一經叅奏。悉照劉崇元等之例。解任親送子弟來京。交部照例議處。○十一年諭。旗員隨任子弟。定例年至十八歲以上始令歸旗。其在京之世襲官年至十歲以上者。送義學讀書。今西甯道楊應琚之子世襲拜他拉布勒哈。番楊重毅。現隨伊父任所。年甫十歲。未至歸旗年分。該旗乃引在

京世職入學讀書之例。行令歸旗。殊屬錯誤。著交部
察議。至於八旗有似此違例將隨任子弟未至年分
行令歸旗者。亦著該部行查。一併交部察議。○十二
年議准。嗣後外任旗員子弟歸旗後。該旗即查
明應送入官學讀書者。送入官學。應披甲當差
效力者。著令披甲當差。效力仍令該旗不時稽
查管束。儻有不務本業在外游蕩者。將該旗該
管佐領照例議處。其另有因事告假等情。應令
該旗查明確實情由。與例相符者。本旗酌量給
假。分別省分定限。給以執照。令其依限歸旗。並

咨部行文該省督撫轉飭地方官按限催令歸旗。如有藉端逗遛不肯歸旗。經地方官呈明督撫押送來京。即送刑部治罪。其有違限者。亦必計其違限月日照例治罪。○乾隆三年議准旗員嫡親子弟舊係同居。實有不能相離之勢。督撫具題到日。由部查明不能相離情由。具奏遵行。如有並非嫡親子弟。或舊非同居。並現在該旗當差。及已經歸旗之後。復請往任所協助者。概不准行。○七年

諭。向來旗員子弟。自幼隨任在外。年至十八歲者。例應

來京。若有欲留任所協辦家務者。准督撫代為題請。聽候部議。其新授外任之官員子弟。在京長養年過十八歲以上者。非奉特旨不得隨任。此舊例也。朕思旗員子弟不許擅隨任所者。一則恐在地方滋事。一則留京以備該旗當差。如外任旗員能嚴加約束。為督撫者又不時稽查。則皆知守分循理。可無慮其多事。至該旗佐領本有可以當差之人。而父兄外任者。將子弟帶往。則本人既可省兩處之日用。該佐領閒散之人。又得當差支領錢糧。以資養贍。洵為兩便之道。嗣後外任旗員子弟。年至十八歲以上者。在外仍

令該督撫題請。在內者呈明該都統查奏。俱准其隨任。其不願隨任者亦聽之。若隨任之後。或出署交游。及干預地方之事。著該督撫即行查參。從重議處。欽此。遵。

旨議定。嗣後外任子弟請留任所者。該督撫覈實情節。先行咨明部旗存案。仍俟年終。由部彙齊人數具題。其在旗各員初莅外任呈請帶往任所者。即呈明該都統查奏。○八年

諭外省官員告病。准督撫題請解任。留於該省調理。病痊復用者。乃國家愛惜人材之意。且以杜借名規避。

之弊也。今田懋所奏該員既以患病解任。又復留於該省調理。未免食用艱難。情亦可憫等語。似亦實情。況原有病痊坐補原缺之例。亦不慮其藉端規避。朕思同知以下官員。亦無甚規避情節。其告病者俱准其回籍調理。病痊照例銓補。不必留於該省。若道府等員。准該督撫具題請旨。其有無規避情節。臨時自難逃朕之洞鑒。著為例。○又奏准各處城守尉四品協領總管等官。有由京補授者。有外省保舉者。其由京補授之人。雖與初設駐防之人不同。然久於任所。子弟充兵當差。與駐防無異。此等人

員之子弟。有情願回京當差者。准其回京。有情願在彼處當差。及幫辦家務者。均照駐防人員例。准留任所。至將軍都統副都統等與文職大員無異。其子弟不便在彼處充兵當差。嗣後將軍等子弟。若已及歲。實有不能離任所情由。均先報該旗都統存案。該旗於年終彙奏。再由京補授之將軍都統副都統等。有已及歲之子弟帶往任所者。呈報該旗具奏帶往。○又奏准各省駐防旗員回京車腳口糧等項。年老患病告退。原品休致官員。來京候補筆帖式。兵丁回京。

襲職及終養之人。仍照從前撥去之例給予。降
調來京之人。照所降之級給予。革職之人。照馬
甲給予。再官兵骨殖家口。從水路回旗者。照例
每五十人給一頭號船。四十人給一二號船。三
十人給一三號船。每骨殖一具。准作一人。其口
糧均按照家口實數給予。從陸路回旗者。官員
骨殖。每一具給一車。家口每六人給一車。兵丁
等骨殖。每一具准作一人。骨殖與人口覈算。每
六口給一車。其無骨殖之兵丁家口。仍照每六
人給一車例。督撫給予勘合。以便沿途填註。○

十五年議准。歸旗人員。限三月催令起程。如有實在不能起程緣由。詳報展限。○十六年

諭。據鑲黃旗滿洲旗分奏。墨爾根城副都統謨爾泰呈請將伊子帶往任所等語。各省駐防將軍副都統旗員等。並非辦理地方事務文職大臣官員可比。嗣後伊等子弟內。如有年已及歲情願帶往隨任者。聽其自便。該旗不必奏請。○十七年

諭。從前旗人凡遇遴選各項拜唐阿。皆踴躍從事。無不欲驅勉出力。今選取鷹狗房拜唐阿。皆託故規避。此風已有年矣。今亦毋庸深究。但不及今整頓。日久恐

更致不堪。著交該管大臣等嗣後選取鷹狗房拜唐阿時。將大臣內何人有子弟。及何人之子弟年歲幾何。可以應選而不送名者。查明夾片一併呈覽。朕別行辦理。欽此。遵

旨議定。各旗遴選拜唐阿。皆以在京官員子弟選取。行走一二年。即推無力行走。具呈告退。殊屬不合。應別行查辦。至外任大臣官員子弟。有奏請帶往隨任者。若任其留於任所。習於晏安。不惟廢棄。伊等亦無出身。應將外官子弟一併開列。進呈遴選。○又奏准。八旗在京大臣官員子弟。外

任大臣官員子弟。凡未選差使之間散養育兵。願入義學讀書之間散。及捐納監生。捐納候缺之中書小京官筆帖式天文生。並考取一應候補各館膳錄官。至十八歲均應選取執事。其進士舉人貢生廩膳生員。繕書房學習之生監。

咸安宮國子監唐古特各學生。皆不在應選之列。嗣後選取執事人時。其外任大臣子弟內。或隨任或未隨任。由該旗確查咨送直年旗彙奏。又議准。外任大小文武旗員之子女年歲。並家丁名數。俱自本旗造冊報部。轉行各該督撫存

案。如由他省轉升者。即由本處布政司查明照例造冊。轉行鄰省。遇比丁選女子之時。即照原冊查封。造冊報部。如到任後家口有增減之處。即時報明該管官查明註冊。○十八年

諭。現在八旗大臣官員。皆係滿洲世僕。伊等身受朕恩。擢用外任。不能盡在內廷當差。理應將伊子等來京挑取各項拜唐阿。代為效力。况伊等之子挑取拜唐阿後。如果行走勤勉。又可挑取侍衛。補放官職。且隨從朕之拜唐阿已甚榮耀。伊等儻不念其大者。惟以伊等之子在拜唐阿上行走。視為苦差。必欲避居任

所間散安居。耽於逸豫。遂至終身不能長進。必致廢棄。嗣後外任大臣官員內。除止有一子准其留住任所外。具有二三子者。止許留任一人。其餘諸子年及歲時。俱令來京挑取拜唐阿。如有四五子之人。著伊等酌量留任二三人。餘令來京挑取拜唐阿。此係朕教養旗人之至意。儻伊等不知此。遇挑選拜唐阿時。又復託故規避。是不知朕惠愛滿洲世僕之恩矣。若將此輩挑取阿哥哈哈珠子。此斷不可。何則。伊等俱係外任。若將伊等之子挑取哈哈珠子。親隨阿哥。則不免有請託營求。轉生事端。所有挑取阿哥哈哈珠

子之處。著停止。○又奏准。八旗世爵。年未及歲。因父兄出任外任。奏准隨任者。將支給半俸概行停止。俟回京後。呈報旗部。再照例給予。○二十年定。護送歸旗家口。造具家口清冊。繕給兵牌尾單。遞程交替。沿途驗看牌單。護送前進。○二十四年。覆准。嗣後旗員回京。即由各該本省給予護牌。飭令沿途營汛。照例黏帖印花。撥兵役護送。毋庸逐省另換。○三十三年。覆准。各省應行回旗之旗員子弟。在父兄任所。因病不能依限回旗者。於文內註明染患何病。並無虛捏字樣。

詳報不必取具印結。○又奏准。旗員給咨回旗家口。並無隱匿遺漏。其承查之員。已有印文可憑者。不必文外取結。○四十五年覆准。外省旗員家口回旗。查明人數。如在十名以上者。填給兵役各二名。十名以內。填給兵役各一名。其兵牌於春口未起程以前。先行發給。仍將起程日期。豫行報部。到京後。限三日內。將兵牌繳送兵部查覈。○四十七年奏准。歸旗人員。中途患病。違限一月。風水阻滯。違限一二月。不及報明地方官。照領憑赴任例。查覈辦理。○四十八年議

准嗣後出差人員。其父兄同往。並年至十八歲以上之子弟。隨往差所者。在內令該旗奏明。在外令督撫查明咨部彙題。○五十年

諭。從前准令外任大臣官員等各帶一子隨任辦理家務。係朕曲成之恩。乃伊等藉此將所有子孫俱留任所。是誠何心。嗣後飭令八旗嚴查伊等子嗣。內年已及歲者。止准奏請一人隨任幫辦家務。其餘年已及歲之子弟及孫。俱著催令回旗。以備挑取差使。儻瞻徇情面。不行咨催者。將該都統等一併治罪。○又議准。此次武職外任挑取侍衛拜唐阿之人。係總

兵以上子弟。其餘官員子弟。俱未經查辦。且向來子弟留任。武職副將以上官員。與文職知府以上官員。一體辦理。今文職既經奏准。知府以上子弟。准留一人隨任。武職自應畫一辦理。嗣後武職副將以上官員子弟。止准留一人隨任。其參將以下等官子弟。仍准本員酌量詳請留任。統俟升至副將。由該旗查明子弟及孫。年已及歲者。准留一人外。其餘即令回京。以備挑差。儘有逗遛及瞻徇不行查催者。將本員及該旗都統等一併議處。再駐防旗員子弟。應行挑取。

拜唐阿者。係都統以上大臣子弟。所有副都統以上大臣子弟。亦應止留一人隨任。其餘駐防官員。仍照舊例辦理。○又奏准。現在奉

旨查辦。挑取侍衛拜唐阿之人。俱係知府以上子弟。至同知通判州縣。以及佐雜等官子弟。俱未奉

旨查辦。其八旗別項差使。則在京閒散。既可挑差以資養贍。本人亦可免兩處費用。應仍准本員詳請留任。俟升至知府時。由該旗查明子弟及孫年已及歲者。准留一人外。其餘即令回京。以備挑取侍衛拜唐阿。儻有逗遛及贍徇不行查催者。

將本員及該管都統等一併議處。○五十六年諭。福康安奏稱慶遠府知府張肇祥之子聞散柏齡。上年奉旨交部咨取來京。該府任意遲延。及屢次檄催。復稱伊妻患病身故。扶襯由水路回旗。現在催令改由陸路赴京。請將張肇祥交部嚴加議處等語。八旗外任官員子弟。年至十八歲。例應回京當差。張肇祥之子柏齡。年已及歲。並不即令回旗。已屬不合。經朕圈出指名調取。又復有意遷延。而該督屢催。輒以攜眷赴任。伊妻中途患病身故。丁憂。於本年三月二十八日。令其扶襯由水路進京。藉詞稟覆。殊出情理之

外。張肇祥於上年十一月初業已接奉部咨。令伊子赴京。自應即令起身來京。若尚未起身。適伊母病故。即應將不便赴京之故。報明該督撫。且向來旗人守制。以百日為期。計算本年二月內。早已服滿。何以遲至三月二十八日。始令由水路起程。是其有心延玩。實屬咎無可辭。張肇祥種種託故。遲延。庇留伊子。尚屬罪之輕者。至以奉旨調取來京引見之人。竟稱令其扶襯歸旗。措詞外謬。豈上對君父之言。大不敬矣。張肇祥著革職送京。交部治罪。以示懲儆。○嘉慶九

年

諭。前因鑲紅旗漢軍都統等具奏該旗有原任福建詔安縣知縣鞠清美。自嘉慶四年參革。問遣後。其家屬尚未回旗。行催已至七次。查該革員名下尚有應賠官項銀三千四百餘兩。未便任令久懸。因降旨諭令玉德查明覆奏。茲據該督奏稱。查詢該參員之子鞠紹勳。據稱現在衣食無資。實無盤費回京。該督等已公捐銀兩。勒令即日起程回旗等語。旗員服官外省。遇有事故。該督撫等即應飭知該員家屬。早日回旗。况鞠清美名下尚有未完官項。安知非該家屬藉詞逗遛。希圖延宕。即實因赤貧無力回京。該督等亦應

據實奏聞。一面催令料理起程。乃事閱數年。並不陳奏。又不嚴催。直待降旨詢問。始行查辦。若非該旗具奏。經朕特旨飭查。仍必延閣不辦。任令日久稽留。成何事體。玉德李殿圖著傳旨申飭。嗣後外任旗員。一有事故。該管上司。即當飭催該家屬迅速回旗。毋任延緩。○十九年奏准。嗣後八旗官員。請假省親。及接送春屬。並新放外任人員。有令親子姪護送赴任者。均由各該堂官給假。如候補候選人員。照例令該旗都統給假。扣去往返程途。不得踰四箇月之限。咨部辦理。仍入彙題。○二十年奏。漕

標試用千總英林之妻和氏子聞散慶齡並未報明私赴任所英林又復載入隨任字樣潛入丁冊希圖蒙混奉

旨。漕標試用千總英林及其妻和氏子慶齡俱著解交刑部審訊具奏。○道光元年奏准旗員外任文武各職情願親族隨任幫辦公務呈報本旗取結報部非由本任職官呈請一概不准其尊長隨任者由該族長出具並無抑勒甘結佐領加結呈報本旗查覈私往者照例治罪漢軍向有佐雜人員亦照此辦理

姓氏命名○乾隆十九年

諭。吏部帶領引見知縣甘珠爾。身係蒙古。名亦蒙古語。自應按滿洲語氣寫漢字。乃遷就漢文。取甘露珠之意。寫作甘珠露。殊屬非是。著將甘珠露漢字之名改寫。並交吏兵二部。所有滿洲蒙古官員之名。於寫漢字時。止按滿洲字語氣寫。毋得鑿取漢字之義。遷就成文。反致將滿洲蒙古語取名之義隱晦。凡有似此者。俱著改寫。○二十年

諭。向來滿洲名氏。惟取清語之與漢字對音者。書寫漢字。不得依附漢姓。故意牽混。從前屢次曉諭。上年因

蒙古有以甘珠露命名者。復經降旨訓飭。並諭吏兵二部旗員中凡有似此者。令悉行改正。乃今日兵部進呈本內。有喀爾吉善題調都司之何督一員。朕初意其為漢人。及閱該員履歷。則係鑲黃旗滿洲人。伊既係滿洲出身。或和或赫。何字不可書寫。乃必牽混漢姓。此種陋習。斷不可長。著再通行曉諭。嗣後儻有仍前混寫者。必當重懲其罪。和督著送部引見。○二

十五年

諭。八旗滿洲蒙古各有姓氏。止因年久。竟有將本姓丟棄。為漢語所染者。如鈕祜祿姓。或有妄呼郎姓。即就

上首之姓呼之。亦應呼為鈕字。竟如漢姓呼為郎姓。可乎。姓氏乃旗人根本。甚關緊要。今若不整頓。任意流下。必致各忘本姓。至於不知交八旗各省。嗣後凡有引見人等。姓氏俱於綠頭牌繕寫。仍限一年。一年後。經朕問及。如有不回奏者。定將該管大臣一併治罪。再選看秀女。亦照此將姓氏於綠頭牌繕寫。將此通行曉諭。○又

諭。刑部議覆溫敏奏盛京滿洲佛志渾即佛色爾渾打死民人王妞兒一案。滿洲當由滿文意義取名。即或用漢字取名。亦當順滿文字意聯寫。佛志渾即佛色

爾渾。想伊本名紛褚渾。佛色爾渾者係伊外號。並非實在本名。先因滿洲取漢人名字。朕屢降諭旨訓飭。溫敏豈不知之乎。辨此一案。應將佛志渾之名。順滿文字意改寫紛褚渾。即不改正。亦當將佛志渾聯寫。今同漢人一樣分寫單字。甚屬不合。滿洲等流習日非。皆由不管事之大臣所致。溫敏著交部嚴加議處。在京刑部滿洲堂官不行看出。亦屬不合。一併交部議處。○又

諭。昨溫敏奏摺內將滿洲名字照漢人分寫。當即降旨諭令滿洲之名應聯寫。不應分寫。通行在案。今正黃

旗滿洲都統為署理那丹珠佐領進呈家譜內。思魁
成安玉麟之名字。俱行分寫。竟謂不可聯寫乎。著該
旗大臣明白回奏。將此再行傳諭八旗各省。嗣後滿
洲之名字俱聯寫。如有分寫者。定行治罪。再宗室內
將名字分寫者甚多。然在近支宗室之名字。分寫猶
可。如遠支宗室。不可如此分寫。此係分別尊卑之一
道。將此通行傳諭知之。○三十四年

諭。直隸總督楊廷璋請將嘉木燦調補河間都司一本。
已依議行矣。嘉木燦係蒙古人。其名用對音漢字。理
應不離質樸之意。何必揀擇纖麗字樣。以致漸染陋

習殊屬非是。著交部另行更正飭知。並諭各該旗嗣後不得復蹈此習。○三十七年

諭。向來內外各衙門題奏咨行事件。凡遇滿洲蒙古人地名應譯對漢字者。往往任意書寫。並不合清文蒙古文本音。因而舛誤鄙俚之字。不一而足。甚至以字義之優劣。強為分別軒輊。尤屬可笑。方今海寓車書大同。清文鑑一書。屢經釐定頒示。且曾編輯同文韻統本三合切音詳加辨訂。合之字音無銖黍之差。第篇帙較繁。行文或未暇檢閱。昨因評纂通鑑輯覽。於遼金元人地名之訛謬者。悉為改正。復命廷臣重訂

遼金元國語解。將三史內譌誤字樣。另為刊定。以示傳信。而現成章疏案牘。清漢對音轉未盡一。於體制殊為未協。著交軍機大臣依國書十二字頭。酌定對音。兼寫清漢字樣。即行刊成簡明篇目。頒行中外大小衙門。嗣後如有滿洲蒙古人地名對音。俱查照譯寫。俾各知所遵守。○四十三年

諭

今日閱看鑲紅旗滿洲承襲佐領家譜。見一支內子孫父子之名。俱以齊字為首。又一支內所有人名。俱以杜字為首。齊杜俱係漢人姓氏。因循既久。數傳後轉似伊等姓氏。竟染漢人習氣。除已經命名者毋庸

更正外。嗣後滿洲等命名。斷不可似此數代同以一字為首。我滿洲原有姓氏。何可忘本而改易漢姓耶。將此通行曉諭八旗各省將軍副都統一體遵行。○

四十八年

諭。現任甘肅永安營遊擊廣明福。係正黃旗蒙古人。以廣明福命名。如漢人名字。甚屬不合。嗣後旗人內。如有似此漢人名字者。著永遠禁止。○五十七年

諭。從前八旗官員兵丁名內。有與大臣等同名者。已降旨令其改易矣。夫與大臣同名。尚行改易。况與宗室近派王公等同名。反有不行改易之理耶。且如保太

即與裕親王之名相同。凡係旗人命名。均應避忌。此字。旺扎爾那木扎爾。皆係身與同時。乃以此字命名伊子。甚屬錯謬。而保太又並未改易。公然稱謂至今。始至福消獲罪。著交八旗都統將現在八旗人等之名。盡行查明。如有似此相同者。令其改易外。嗣後生子命名呈報該旗時。該旗都統等務各切實查覈。設有濫行命名者。即時改易。○嘉慶八年奉

旨。各

陵名清語。俱係敬謹尊上。即如

恩特和墨

瑚圖靈阿

額勒登額

孝順阿

安巴靈武

額勒和

托謨宏武之清語均非臣下命名所應用。著交八旗令現在大臣內。有以此等清語命名者。即著自行具奏更改。官員兵丁內。有以此等清語命名者。即著呈明該管大臣更改。嗣後八旗臣僕。俱不得以此等清語命名。所有黑龍江副都統銜總管色爾袞原賞之巴

圖魯名號。著改為強謙巴圖魯。○十三年覆准。嗣後
遇有人名等項字樣與

肇祖

興祖

景祖

顯祖廟號二字相同者。俱應避寫。以昭敬慎。○十九年

覆准。滿洲監生特克興阿。特克通阿。原名均不

成清語。遵

旨更改。與尋常捐納貢監更名不同。准其更名振興振

麟。○又奉

旨。浙江嚴州協副將吉祥保。命名尚屬漢文成語。著毋庸更改。○二十年奉

旨。內閣侍讀福祥阿。戶部員外郎福康阿。命名既非清語。又於漢文不協。福祥阿著改為福祥。福康阿著改為福康。○又

諭。昨日山西蒲州府知府一缺。已將福蔭補授。該員身係旗人。其原名福蔭長三字。竟似漢人姓名。殊屬不合。著令改名福蔭。嗣後旗人命名。如用滿洲蒙古成語。自可不拘字數。若有取漢文字義者。止准用兩字。不准連用三字。○二十二年奉准。嗣後八旗武職更

名者。統令各該都統查明該員任內有無奉

旨不准保升。及不准捐復。並永不敘用事故。於文內

聲明。如無前項事故。准其更改。查有情弊。將本

員照不應重例杖八十私罪律。降三級調用。出

結之該管佐領降一級調用。參領等官降一級

留任。都統副都統罰俸一年。○道光十八年

諭。向來旗人命名。如用滿洲蒙古成語。自可不拘字數。

若有取漢文字義者。止准用兩字。不准連用三字。朕

屢經降旨。明白宣諭。近來京外文武各員內。仍有連

用三字。並非滿洲蒙古成語。大屬非是。著八旗都統

副都統各省將軍都統副都統城守尉通飭所屬。嗣後旗人命名。務當查照歷次所降諭旨。永遠遵行。經此次飭諭之後。儻再有連用三字文義不相連屬。並非成語者。一經查出。定將該管之都統等懲處不貸。

○三十年二月

諭。程喬采奏總兵稟請更名一摺。拴住著毋庸更名。嗣後凡有與朕名同音之字。均著毋庸改避。○咸豐四年議准。鑲白旗監生鐵柱鋼柱二名。因與

御名音同敬避。與尋常捐納監生更名不同。柱字均准改為林字。○光緒七年覆准。滿洲鑄譯生員溥

容。文。生。員。溥。受。因。名。上。一。字。與。宗。室。輩。分。溥。字。
相。同。准。其。改。為。普。字。